

Istorgia dals Gidieus en Svizra ed en il Grischun

■ Singuls chats archeologics or dal quart tschientaner che derivan dad Augusta Raurica (p.ex. in anè cun menora) laschan supponer ch'ils emprims Gidieus sajan arrivads cun ils Romans en il territori da la Svizra odierna.

Schebain i deva già da quel temp ina cuminanza religiusa u singulas famiglias gidieus che vivevan al lieu sto però restar avert; i po er sa tractar d'objects pers d'in commerziant gidieu u da souvenirs da Romans. Bain vegnan ils Gidieus er menziunads en la Lex Burgundionum da ca. 500 s.C., ma archeologicamain sa lascha ina preschientscha stabla da Gidieus pir cumprovar en l'emprima mesadad dal 12avel tschientaner a Geneva.

L'onn 1213 èn Gidieus er cumprovads a Basilea, numnadamain cura che l'investg ha pretendi la restituziun d'in pegn ch'el aveva deposità tar in emprestader da daners gidieu. En il decurs dal 13avel tschientaner èn vegnidas fundadas cuminanze gidieus a Lucerna (1252), Berna (1262), Son Gagl (1268), Winterthur (avant il 1270), Turitg (1273), Schaffusa (1278), Zofingen e Bischofszell (1288), Rheinfelden (1290), Geneva (1281), Montreux e Losanna. Las pli impurtantas sa chattavan a Berna, Turitg e Lucerna.

Da quel temp èn ils Gidieus er vegnids persequitads repetidamain, savens tenor il muster da la legenda dals murdratschs rituals.



A Berna è per exempel vegnida messa sin la roda ina part da la populaziun gidieua sut il

pretext ch'ils Gidieus hajan mazzà in mattatsch; la populaziun restanta è vegnida stgatschada da la citad, entant ch'il mattatsch è pli tard vegni venerà sco martir sut il num Rudolf da Berna. Cura ch'èn proruttas il 1348 en tut l'Europa epidemias da pestilenza, han ins accusà ils Gidieus d'avair tissentà ils bigls; en blers lieus al han ins brischià sin il stgandler, t.a. a Berna, Soloturn, Basilea e Turitg. La populaziun gidieua surviventa han ins stgatschà dal pajais, uschia ch'i n'ha strusch dà Gidieus en Svizra fin en il 19avel tschientaner.

L'exceziun en la Veglia Confederaziun han furmà ils Gidieus che vivevan dapi l'entschatta dal 17avel tschientaner en il signuradi cumin da Baden, e quai sut in statut spezial, il qual la Dieta confederala ha confermà l'ultima giada il 1776. Il lieu da domicil dals Gidieus sa restrenscheva sin ils dus vitgs argovians Endingen e Lengnau (cf. sutvart). La fin dal 18avel tschientaner vivevan qua 553 Gidieus, quai che correspundeva quasi a l'entira populaziun gidieua da la Svizra. La gronda part da las enconuschentschas davart il giudaïssem en Svizra da quel temp derivan dal predigtant reformà da Turitg Johann Caspar Ulrich ch'ha edi il 1768 a Basilea sia «Sammlung Jüdischer Geschichten, welche sich mit diesem Volk in dem XIII. und folgenden Jahrhundert bis auf MDCCLX. in der Schweiz von Zeit zu Zeit zugetragen».

Suenter la Revoluziun franzosa han ils Franzos occupà l'onn 1798 la Veglia Confederaziun. Durant la helvetica è l'idea da l'emancipaziun bain avanzada in pau; ma la finala dueva anc la Constituziun federala dal 1848 discriminar ils Gidieus en quel senn che la libertad da domicil e da cultus sco er l'egualitad en proceduras giudizialas sa restrenschevan a burgais svizzers cristians. Quai è sa midà cun la revisiun parziala da la Constituziun l'onn 1866 ch'ha concedi als Gidieus la libertad da domicil e pussibilità da pratigar cumplainamain ils dretgs da burgais. Questa egualitad dals dretgs è entrada en vigor en tut ils chantuns a medem temp, cun exceziun dal chantun Argovia che l'ha acceptà pir il 1879.

En vastas parts da la populaziun è però sa mantegnida ina tenuta sceptica envers ils Gidieus; uschia è per exempel ve-



La cultura gidieua è surtut preschenta en Svizra en las grondas citads.

(FOTO: PDI)

gnida acceptada il 1893 l'iniziativa dal pievel ch'ha pretendi in scumond da mazzar tenor l'usit ebraic (stgannar). Il 1894 ha cumenzà en Frantscha l'affera da Dreyfus; quella dueva intimar Theodor Herzl da scriver il cudesch «Der Judenstaat» (1896), en il qual el ha pretendi in agen stadi per ils Gidieus e cun il qual el ha mess ad ir il moviment dal zionissem. Sut l'egida da Herzl è vegni manà tras gia il 1897 a Basilea l'emprim Congress mundial zionistic.

En in process ch'ha gi lieu tranter ils onns 1933–1935 a Berna èn ils «Protocols dals sabis da Zion» da tenuta antisemitica vegnids condemnads ed ils editurs sentenziads a chastis pecuniars. Sco expert è stà involvi en il process Carl Albert Loosli ch'aveva gia sentenzià l'onn 1927 l'antisemitissem en sia scrittira «Die schlimmen Juden!» Il november 1937 è la sentenza dal 1935 però vegnida cassada per motifs formals.

Durant la Segunda Guerra mundiala han ins renvià als cunfins svizzers almain 30 000 persunas, tranter quellas er blers Gidieus. Suenter tractativas cun la Svizra ha la Germania naziunalsocialistica marcà a partir dal 1939 ils pass da Gidieus cun in «J» (bul dals Gidieus). Tar las persunas ch'han gidà a salvar Gidieus dal holocaust tutgan en Svizra tranter auter Karl Barth, Friedrich Born, Paul Grüninger, Gertrud Kurz e Carl Lutz.

Oz vivan en Svizra tranter 18 000 e 20 000 Gidieus, quai correspunda a ca. 0,4 % da la populaziun (situaziun dal 2007). Igl existan cuminanze ortodoxas, conservativas e liberalas. Radund la mesadad dals Gidieus en Svizra vivan en la regiun da Turitg e var 80 % da las Gidieus e dals Gidieus èn burgais svizzers. L'organiziun politica dals Gidieus en Svizra è la Federaziun svizra da las communidades israelitas ch'è vegnida fundada il 1904.

Tgira dal patrimoni gidieu en Svizra
Patrimoni cultural gidieu en il chantun Argovia

L'istorgia dals Gidieus en Svizra ha ina colliaziun particulara cun il chantun Argovia. Durant passa duatschient onns èn las vischnancas dad Endingen e da Lengnau en il Surbtal stadas il center da la vita gidieua. Famiglias gidieus eran vegnidas en il Surbtal, suenter ch'ellas eran vegnidas stgatschadas or da las citads e suenter ch'ellas han pudì sa chasar il cumenzament dal 17avel tschientaner durablamain en Svizra mo pli ad Endingen ed a Lengnau. En quests dus lieus, che

vegnivan er numnads ils «vitgs dals Gidieus», era temporarmain ina gronda part dals abitants gidieua. Oz è la regardanza a quest'istorgia ina part dal patrimoni cultural immaterial dal chantun Argovia, e questa regardanza vegn vivida en differentas modas e manieras. Sin la «Via culturala gidieua Endingen-Lengnau» vegn raquintada dapi l'onn 2009 l'istorgia dals Gidieus en il Surbtal. Purschidas turisticas pussibiliteschan a persunas interessadas da visitar las sinagogas ed auters edificis. Il roman «Melnitz» da Charles Lewinsky maina ils lecturs en ils lieus principals da l'istorgia gidieua locala. Dapi intgins onns ha lieu il settember – principalmain a Baden – l'«Emna culturala gidieua». Las cuminanze religiusas gidieus dad Endingen e da Baden èn activas. Tant en questas cuminanze sco er en il circol privat vivan ils Gidieus – sco tut las religiuns – tenor tradiziuns multifaras da la cretta individuala.

Basilea: Museum giudaic da la Svizra e Fond dad Anne Frank

A Basilea sa chatta il Museum giudaic da la Svizra (cf. www.juedisches-museum.ch). La collecziun preschenta objects da differenta provegnientscha che porschan in'invista variada en la moda da viver dals Gidieus sco er en l'istorgia da la cultura, da la religiun e dal pievel giudaic. Ils exponats vegnan preschents tenor la suandanta structura tematica: ductrina giudaica, cult giudaic, vita da mintgadi giudaica, istorgia giudaica. En l'ultima part vegnan er preschents documents ed objects ch'illustreschan l'istorgia dals Gidieus en Svizra ed en il territori vischinant.

Medemamain a Basilea ha il Fond dad Anne Frank sia sedia. Quel è vegni fundà l'onn 1963 dad Otto Frank, il bab da l'atura dal famus «Diari dad Anne Frank». Il fond è vegni institui sco ertavel universal dals dretgs d'autur da las ovras, brevs e fotografias dad Anne Frank (1929–1945) ch'è daventada in'unfrenda dal holocaust. Las entradas servan ad intents caritativs.

Preschientscha e destin dals Gidieus al cunfin da la Svizra Orientala

Museum giudaic a Hohenems

Sur tschientaners han duas vias segnà la pitschna citad da Hohenems, situada en il Vorarlberg da la vart orientala da la Val dal Rain songagliaisa: la «Christengasse» e la «Judengasse». L'onn 1617 aveva il cont imperial da quel temp, Kaspar von

Hohenems, stgaffi cun ina brev da proteziun la basa giuridica per che famiglias gidieus possian sa domiciliar al lieu e fundar ina cuminanza gidieua. L'intenziun economica era stada quella da dar vita a Hohenems sco lieu da martgà cun agid da martgadants gidieus. Malgrà expulsions en il 17avel, è sa sviluppada al lieu ina cuminanza gidieua cun ina sinagoga, ina scola, in bogn per rituals (Mikwe), ina chasa da vegls ed in santeri.

En il 18avel tschientaner è la cuminanza creschida cuntinuadamain ed ha cuntanschi en l'emprima mesadad dal 19avel tschientaner ses zenit demografic. Ils Gidieus da Hohenems han tgirà streugas relaziuns da commerzi e da famiglia en las regiuns vischinantas, ma er fin a Triest, Frankfurt, Paris, Vienna, Constantinopel ed en ils Stadis Unids. Bleras famiglias gidieus èn stadas activas en il commerzi e pli er en l'industria (industria textila, bancas, viafiers, bierarias, commerzi da cudeschs ed assicuranzas). Cura che la Svizra (1866) e l'Austria (1867) han concedi als Gidieus il dretg da sa domiciliar libramain, èn blers emigrads da Hohenems en citads pli grondas.

L'onn 1935 dumbrava la cuminanza gidieua anc 16 commembers. Bainspert han quels stui sentir la violenza nazional-socialistica. Il 1938 è vegni confiscà il possess da la cuminanza religiusa ed il 1940 è quella vegnida schliada. Ils otg Gidieus restants èn l'emprim vegnids deportads a Vienna e silsuenter en ils champs da concentraziun e d'extirpaziun en l'ost.

Il Museum giudaic a Hohenems preschenta bunamain 400 onns d'istorgia giudaica. Il focus da la collecziun furman d'ina vart la cuminanza religiusa da Hohenems sezza, da l'autra vart las regiuns cunfinantas Tirol, Svizra e Liechtenstein sco er la diaspora cun ragischs a Hohenems.

Regina Zimet – l'Anne Frank da la Vuclina

Suenter in'odissea da plirs onns chatta la famiglia gidieua Zimet, oriunda da Lipsia ed en fuga en l'Italia dal Nord, il december 1943 asil en la chasa da la famiglia da purs Della Nave. A San Bello, dattiers dal cunfin svizzer, passentan la mattatscha da 13 onns Regina e ses geniturs 16 mais segnads da tema e speranza. Cuntrari ad Anne Frank dueva Regina Zimet survivor il holocaust; pli tard è la famiglia emigrada en la Palestina/Israël. A chaschun d'ina visita en la chasa pater-

na da sia mamma en la Vuclina è Marco Frigg, oriund da Cuira e dapi il 1975 magister a Cazas, vegni a savair dal destin da la famiglia gidieua Zimet. A basa da l'autobiografia «Al di là del ponte» da Regina Zimet-Levy e dals discurs cun commembers da la famiglia Della Nave ed autras perditgas dal temp publitescha el ils dus cudeschs «Regina Zimet – die Anne Frank des Veltlins» (2007) e «Max Del Nero und Regina Zimet» (2011).

Ils Gidieus en il Grischun

Las obligaziuns finanziaias dals investgs da Cuira envers ils Gidieus da Constanza e Turitg dals onns 1304, 1409 e 1456 èn ils emprims documents per il Grischun. La Dieta da las Trais Lias dal 1655 permetteva a cromers, colportaders e viandants da far commerzi sulettamain a las fieras, en tut ils auters cas avevan els in scumond da dimora. Ils protocols dals cussegls dals onns 1667 e 1682 documenteschan relaziuns da Gidieus (surtut da Hohenems) cun l'institut monetar a Cuira. Il dretg da la Republica veglia na renvescha nagliur ad in dazi da Gidieus che vegniva incassà uschiglio dapertut fin la fin dal 18avel tschientaner. Il 1798 avevan principalmain ils Gidieus da Hohenems survegni la permissiun da far commerzi. Ils mastergnants da Cuira avevan dentant reclamà ed ils 18 da schaner 1800 ha la Regenza intermala proclamà l'expulsiun immediata dals Gidieus dal Grischun. La patenta da commerzi è alura vegnida auzada massivamain.

Ils 27 d'avust 1803 ha la Regenza grischuna decretà in scumond absolut da dimora e commerzi per Gidieus cun l'argument ch'il Grischun stoppia vegnir preservà da donns economicos e morals tras il commerzi dals Gidieus. Quest decret è vegni confermà danovamain il 1838. Il 1850 han ins snegà, conform a la Constituziun federala, il dretg da dimora e commerzi mo a Gidieus esters, en il Grischun èn il domicil ed ils dretgs politics dentant vegnids refusads era als Gidieus svizzers; ins admetteva mo quai che la Constituziun federala ordinava explicitamain.

A l'entschatta dals onns 1860 ha il suveran svizzer cumenzà ad abolir tut las restricziuns per Gidieus svizzers ed esters. Fin alura na chatt'ins nagins domicils da Gidieus en il Grischun; il martgà n'era betg attractiv e las autoritads pauc tolerantas. Il 1863 ha la famiglia Bermann avert a San Murezzan l'Hotel Edelweiss, l'emprim hotel manà d'ina famiglia gidieua en il Grischun. Alura èn suandads il Sanatori Etania a Tavau (da ses temp il sulet sanatori sut direcciun da Gidieus en Europa), e l'Hotel Metropol ad Arosa (famiglia Levin). Il pievel grischun aveva tradiziunalmain pouca simpatia per ils Gidieus, quai che vegniva era promovì da la baselgia. En il decurs dals tschientaners ha l'antigiudaïssem religius ed economic laschà numerus fastizs en la litteratura, en la publicistica ed en la lingua da mintgadi.

Las fronts antisemiticas (rassisticas) dals onns 1930 han però chattà paucs simpatisants en il Grischun, era sche l'antisemitissem (almain ils stereotips antisemitics) era generalmain derasà ed instrumentalisà sin il plaun politic-ideologic era en il Grischun. Moses Silberroth per exempel è stà expos (sco subject preferi) ad attatgas antisemiticas ordvart primitivas e virulentas da vart d'ina gruppa d'avocats da Cuira e Tavau. L'antisemitissem sco element dal cumbat economic-politic ha survivi (almain a Tavau) anc in temp sur la fin da la Segunda Guerra mundiala ora.

La preschentaziun:

Dossier «Istorgia dals Gidieus en Svizra ed en il Grischun».

Dapli infurmaziuns:

chatta.ch/?hiid=4051
www.chatta.ch